

光緒癸酉冬月重刊

增廣大生要旨

惠直堂申藏版

增廣大生要旨序

大生要旨一書吾邑名宿唐桐
園先生輯以壽世者也書凡五
卷合婦科產科而一之使未
生者保生將生者遂生已生者

全生體天地好生之心以生之不
窮生之不息誠哉貫為大生也
是書板久漶漫近且失傳又所
輯但古方如新出休甯汪氏產科
心法脈藥各條闕而不備其他家

傳秘方無倫矣雲間葉君雅卿
窮究刀圭六氣五味均有心得
胎產一門母子命懸呼吸不容稍
緩頃與也爰取原書悉以心法
及秘方數則增廣成編錄以示

余謂古來方書如孫思邈千金方

蘇沈良方按籍而稽或格不下

以故仲景稱醫聖所著方猶待

後人參酌而行之運用在一心醫法

固不殊兵法也然獨至保產保嬰

咸豐八年人日

海上翼雲江駕鵬謹識



大生要旨原序

天地之大德曰生人者天地之心也自帝王卿相下逮一命之士編戶之民鈞是人卽鈞是心莫不以好生爲念而况人之始生兒命所關卽母命所係其所爲維持調護者更不可不周且詳也往者修善之家刊達生編保產機要等書世多有之而相沿襲刻未曉醫理其中不無舛誤且止及臨盆一節而於統前徹後凡得子之道育嬰之方則缺焉未備有心者每以爲憾同邑唐君桐園儒而醫者也其先封王父上采公精岐黃術以藥濟人行誼著通志孝義邑志獨行中尊人仁巖先生余之表母舅也明經碩望

秉鐸白門都人士翕然宗之居鄉居官咸能矜恤單寒至今猶感道不衰蹟亦具於邑乘君稟承世德學有淵源更師事邑之名醫王協中先生同遊講貫精通靈素百家今三折肱矣著有內經註疏傷寒論註疏脈燈諸書義博帙繁剗劖尙需歲月而彙輯大生要旨一編分種子胎前臨盆產後保嬰五卷參用舊說間出新裁視向來諸本務折衷於十全而無弊縉紳仁者見而寶之其勤付梓會予荷天子寵命巡撫黔中赴江蘇

行在所請

訓便假旋里得快讀斯編見其言簡而意該例明而義舉防於

未至拯於將危所附諸方一一斟酌精審在富室固可奉
行卽貧家亦可遵守至荒村僻壤急遽倉皇之際罔不可
檢閱以知保護因以歎是書之用心足補造化所不及而
爲功至鉅且遠也語云不爲良相卽爲良醫君真今之國
手乎播諸遐邇全活必多卽謂能體乾之大生坤之廣生
也可乾隆二十七年喬光烈潤齋氏序



產科心法自序

醫之一道爲司命之司原非容易但能存心濟人博考羣書臨症體察以人性命爲重雖未能有聖賢之學而虛實寒熱表裏陰陽辨釋明白用藥得當自不致於悞人而胎產一科尤宜謹慎守法略一錯悞則胎不保甚至產母亦傷能無怨乎至於產後總屬氣血空虛丹溪先生云雖有他症以末治之此誠千古格言自當遵前賢制方選用斷不可以杜撰悞人如無憂散佛手散生化湯之類千古不磨毋庸苟且每見今人醫產全不合法一味杜撰好奇名爲生化實非生化之意

時醫蓋以專誠請來僅以古方施治不特負此一請且恐爲人看輕

不得不搜索枯腸另開方體厚者僥倖得愈設遇體薄者藥而卒以害人深堪痛恨禍必立至至於產後汗出須防元陽外越泄瀉卽防中氣下脫喘急更防惡露上逆此皆產後極忌之處而產後發熱常有之也緣下元空虛陰虛生內熱只須四物湯加童便熱卽退也間有瘀血不行者有經風者有停滯者有蒸乳者各審其因而藥之風感者用歸芎補血之中加黑荆芥一味足矣蓋產時體虛百節開張腠理不固易入易出若表其汗則元陽外越未有不死者也其停滯者只於理脾之藥加穀芽陳皮可矣蓋脾虛則不運化宜用陽藥以助脾溫胃卽運化矣須知產後有邪總宜補中兼消未有

消而不補之理有等初學無傳之輩放胆竟用柴苓羌防
山查神麴之劑似治傷寒之病忘卻產後之身致輕者變
重重者卽死悞人不淺真可畏怕也況中風一症乃血虛
者多內經謂治風先治血血行風自滅張景岳先生師其
意發有非風之論此皆醫平人而言尙謹慎如此而況產
後肝血空虛虛生內風更可知矣夫天地有好生之德吾
儕可不慎重於斯而以人性命爲兒戲哉予每見而憫焉
因產科心法纂選成書此吾數十年來用之效驗悟於心
而應於手且簡而不繁俾產家觀之爲準繩則性命得以
安全醫家一有準繩則舉手無錯悞矣乾隆四十五年休

甯樸齋汪詰序

大生要旨一書爲世所珍久矣顧胎產各症間有未備方藥者令人不能無憾夫生育一事比戶有之順者固無煩醫藥設逢險逆刹那之頃兩命所係苟不速爲補救曷能母子兩全而窮鄉僻壤間延醫動至數里往返俄延鮮不敗事一爲設想不禁悚然爰集休甯汪樸齋先生名所著產科心法及家藏胎產各方附列大生要旨中名之曰增廣大生要旨付諸手民苟家置一編平時習閱則臨期可按症施治亦未始非生育之一助也猥以謏陋見聞未廣恐掛漏尙多倘

高明君子有以匡余不逮而賜教焉幸甚

咸豐八年歲在戊午孟夏

婁縣葉灝雅卿氏識